

Date – 31/03/2025

Time - 7:30 -7:40Hrs

REGIONAL NEWS BULLETIN

HEADLINES (MORNING)

1. Central YMA, Aizawl Municipal Corporation leh UD&PA Department te thawhhona hnuaiah vawiin hian Mizoram pumah ‘Faina Hnatlangpui’ koh a ni a. Tukin atang khan veng leh khaw thenkhat chu an hnatlang tan.
2. Tunlai hian khua a lum chho leh mek a, nimin khan Lengpui chuan March thla chhung bika a lum ber dawt tum a tawng.
3. Sawrkar laipui chuan Manipur, Nangaland leh Arunachal Pradesh hmun engemaw zatah thla ruk chhung atan Armed Forces (Special Powers) Act (AFSPA) a pawtsei.
4. Prime Minister Narenra Modi-a’n Naxal helte chetthlatna thin Chhattisgarh-ah muanna tluantling hmuh mek zel a ni a ti.

<><><>

CLEANLINESS

Central YMA, Aizawl Municipal Corporation leh UD&PA Department te thawhhona hnuaiah vawiin hian Mizoram pumah ‘Faina Hnatlangpui’ koh a ni a. Tukin atang khan veng leh khaw thenkhat chu an hnatlang tan a ni.

Vawiin hian veng hrang hrangah, Branch YMA leh Local Council te kaihhrainain mahni veng chhung theuh te tih fai hnatlang thawk turin veng tin te beisei leh ngen an ni a. Heng bakah hian Aizawl khawpui chhunga hmun bawlhhlawh zual thlan bik te thian fai turin mi thahnemngai leh tlawmngai te an thawk chhuak baw ang.

Faina Hnatangpui hi Sikulpuikawnah chawhma dar 10-ah hawn tur a ni a. Hetah hian UD&PA Minister leh department hotute, AMC Mayor leh official pawimawh te bakah CYMA hruaitute leh a bul hnai YMA branch aiawh te an tel dawn a ni.

CYMA, UD&PA leh AMC te tangkawp chuan kum 2025 – 26 chhung atan Aizawl khawpui faina kawnga chak zawka hmalak a nih theih nan thawhhona thuthlung an siam a. Chumi hnuaia hmachhawp hrang hrang te zingah Faina Hnatlangpui hi a hmahruai a ni a. Thawhdunna kal zelah YMA Branch tan Fainaah Inel tur a ni baw a, Hnatlangpui hawna inkhawmah hian YMA Branch Fai Inelna 2025 chu khuhhawn a ni nghal baw ang.

<><><>

MALARIA ELIMINATION

Health department hnuaia National Center for Vector Borne Diseases Control (NCVBDC) hotute chuan India ram pumah Mizoram leh Tripura chu Malaria la tam zualna a nih thu an sawi.

Akashvani in a kawmnaah department hotute chuan he thu hi sawiin Mizoram leh Tripura tih loh India ram state dangteah chuan malaria chu an thunun hneh viau tawh thu an sawi a.

Mizoram chhungah pawh malaria chu a ziaawm tawh hle thu sawiin hetihruah hian Mamit, Lunglei, Lawngtlai leh Siaha district te tuna malaria awm tam zualna a la nih thu an sawi a. Heng district-ah te hian a la tam deuh avangin Mizoram dinhmun pawh a la chhiat phah rih thu an sawi a. District dang zawng zawngah chuan malaria tibbo kawnga sorkar laipuiin a rawn beisei ang an phak thuak tawh thu an sawi a ni.

NCVBDC hotute chuan malaria chu India ramin kum 1950 chho atangin a lo do tawh tih sawiin malaria umbo tuma hmalakna chu a upa tawh hle tih an sawi a. Sorkar laipui chuan kum 5 te te in malaria umbo hna a kalpui thin tih sawiin kum 5 zel tih chu a tawk ta lo tih a hriat hnuah sorkar chuan kum 2016 atangin kum 15 daih malaria tibo tura beihpuithlakna tur, National Framework for Malaria Elimination a siamchhuak tih an sawi a. Kum 15 chhunga mar taka tanga malaria um bo ngei ngei turin an rawn beisei thu an sawi a. NCVBDC hotute chuan malaria chu Mizoram hmai balhna a nih theih dawn avangin tan lak nasat a ngaih thu an sawi a. Mipuite chu an thawktute ziritirna ngaipawimawh tur leh an thil sem damdawi hrang hrang te thuawih taka mithiamin a hun bi an sawi anga ei thin turin an chah a ni.

<><><>

PHE

Public Health Engineering (PHE) department Engineer-in-Chief Pu H. Duhkima chuan Jal Jeevan Mission hnuaiyah Mizorama thingtlang khua zawng zawng tui connection pek ni tawh mah se khaw thenkhat tuia harsatna nei an awm leh tawh thu a sawi.

Akashvani palaiin a kawmnaah he thu hi sawiin Pu H. Duhkima chuan tui in tur pek kawnga sorkar laipui hmalakna pawimawh Jal Jeevan Mission hnuaiyah thingtlang khaw 728-ah tui connection pek vek an nih tawh thu a sawi a. Hetah hian khaw sipera ngaih zawng zawng pawh an ni chuan khua anga chhiarin an telh vek thu a sawi a. Jal Jeevan Mission programme hnuaiyah tui connection pechhuak vek tawh a an inngaih laiin a mission tawp hnu kum 1 em pawh la ni loah khaw 66 in tui hna tlem avangin tui laknaah harsatna an tawh leh tawh a ti.

PHE Engineer in Chief Pu H. Duhkima chuan khawpui lamah pawh an chhinchhiah danin Mizorama khawpui 28-ah khawpui 17, a zatve aia tam daih chu an dawn tur ang la dawng lo, tui khawpkham lo an la nih thu a sawi a. Khawpui bakah thingtlang hmun tam takah chuan an khua aia sanga an kham khawp tui lakna tur tui hna a awm tawh loh avangin ruam atanga pump a ni tlangpui tawh niin a sawi a. Khawpui lianah phei chuan pump-ah a innghat ber tih sawiin eng ang pawhin khawl tha leh hmanraw tha awm mah se tui hna ber a that loh chuan awmzia a awm loh thu a sawi a ni.

Pu H. Duhkima chuan ramngaw tih chereu avangin Mizorama tui hnain a tuar nasa a, tui khamkhawp hmu thei lo khua an tam phah hle a ni a ti a. Ruahtui dawhthleng tha tak chu ram ngaw a nih thu sawiin ram ngaw tha tak

siam a pawimawh thu a sawi a, fur laia inchunga tui luanliam tir mai mai, tui dah khawl ngaipawimawh lo an tam tih a sawi a. Thal a lo thlenin sorkar an dem leh mai thin a ti a. Nunna atana pawimawh tak tui dahkhawl na tur tuizem lei tul ti lo an tam chu pawl a tih thu a sawi a. Tui dahkhawl uar zel turin mipuite a sawm a ni.

<><><>

WEATHER

Tunlai hian khua a lum chho leh mek a, nimin khan Lengpui chuan March thla chhung bika a lum ber dawt tum a tawng.

India Meteorological Department (IMD) in a taran dan chuan, nimina Lengpui khaw lum zawng kha Degree Celsius 36.5 a ni a. March thla bika Lengpui khua a lum ber tum chu kum 2022 March ni 3 kha niin, khami tum khan Degree Celsius 36.6 a ni a, tun tuma mi nen hian a inhnaih hle.

IMD, Aizawl Centre Director Sudheer Kumar Dwivedi hnen atanga Akashvani thudawn dan chuan, khua a lum chhoh zel avangin mipui te chu pawimawh bik loah chuan pawna chhuak tam lo turin a chah a, mahni in chhuahsan tur te pawh tui in tur ken nachang hre turin a chah bawk a ni.

<><><>

PRISON

Kolasib District Jail tang, damlohna avanga Kolasib District Hospital-a enkawl a nih laia tlan chhuak Seikholen Khongsai chu nizan khan Kolasib Police ten an man.

Seikholen Khongsai hi Inrinni zan khan a tlanbo a, ngawrh taka zawn nghal niin nizan khan Silchar-ah man a ni a, nizan vek khan Kolasib Police Station hruai thlen niin, Police Custody-ah hren mek a ni.

Nikum August ni 21 khan Kolasib Police leh Kolasib Sub-Hqrs YMA Kumpulan duty ten an thudawn bawhzui in, Sethawn bul Kawngpuiah Seikholen Khongsai hi a thian te nen Ruihhlo (No 4) an kawl avangin an chuanna Gypsy nen man an ni a, Kolasib Police-ah thubuai ziak lut in, District Court-ah pawh hruai a ni thin.

Seikholen Khongsai hi tun hnai khan a Awm chung na leh khawsik avangin Doctor hnenah hruai in, entir a ni a, Doctor thurawn angin kar kalta Ningani khan Kolasib District Hospital-ah admit a ni a, enkawl a nih mek lai in amah vengtu Police chu Toilet-ah a inthiar hlan in Kolasib District Hospital atang hian chin hriat loh in a tlanbo a, mahse hun rei lote chhungin Police ten an man leh ta a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

CENTRE EXTENDS AFSPA IN PARTS OF MANIPUR, NAGALAND, ARUNACHAL PRADESH FOR SIX MONTHS

Sawrkar laipui chuan Manipur, Nangaland leh Arunachal Pradesh hmun engemaw zatah thla ruk chhung atan Armed Forces (Special Powers) Act (AFSPA) a pawtsei.

Nagaland-ah chuan district 8 huam chhungah leh police station 21 huam chhungah AFSPA hi pawhsei a ni a. Hei hi April ni 1 atanga intan tur a ni. Ministry of Home Affairs (MHA) thuchhuahin a sawi danin Dimapur, Iuland, Chumoukedima, Mon leh Kiphire-te chu ram buai (disturbed area)-ah puan a ni.

AFSPA hi Arunachal Pradesh-a Tirap, Changlang leh Longding district bakah police station 3 huam chhungah pawhsei a ni a. Manipur-ah chuan district 5 leh police station 13 huamchung tih lovah chuan AFSPA hi pawhsei vek a ni a. Chung zingah chuan Imphal, Wangoi, Bishnupur leh Kakching police station-te a tel a ni.

Armed Forces (Special Powers) Act (AFSPA) hi India Parliament dan siam, ram buaina hmuna mipui nunphung thunun tura Sawrkar laipuiin a sipaite tha chakna hman a tulna hmuna hman thin a ni.



PM MODI LAUNCHES DEVELOPMENT PROJECTS WORTH RS 33,700 CRORE IN CHHATTISGARH

Prime Minister Narendra Modi-a chuan Chhattisgarh Bilaspur district-a Mohbhata-ah hmasawna hnathawhte hawngin thawh leh tur lungphum a phum a. Hengte hi kawlpheha, lam lian, rel kawng, tuialhthei leh gas, zirna leh chenna in kaihhnawiha hmasawna turte a ni a, a zavai hian cheng Vbch sing 3 sang 3 leh 700 chuang hu a ni.

Vantlang inkhawmah thu sawiin Prime Minister chuan Naxal helte chetthlatna thin Chhattisgarh-ah chuan muanna tluantling hmuh mek zel a ni a ti a. Thingtlang khaw kilkhawr thlengin lamlian, kawlpheha, biakhlatna leh hriselna bakah, thil dangah pawh hmasawna hmuh zel a ni a ti a. Tun hnai kum reilote chung khan Naxal hel hluar thinna hmunahte sikul thahnem tak hawn leh a ni tawh a, Chhattisgarh dinhmun chu a inthlak thleng tawh a ni Narendra Modi-a chuan a ti bawk.

